

文274.431

184

17



開封紀行稿序

兵科都給事中葉君當天子初政出鎮河南招流撫下  
納民於輯而涉時月之久履山川之勝觀事爲之變因  
慨然有爲東周之心無所於託此開封紀行詩所以著  
志也詩古今雜體凡三百八十七首足乎理充乎氣豐  
乎才其辭語恬雅如太羹在鼎不事燔炙滋味自真其  
意思圓美如芙蕖出水略無枝蔓姿色澹若其氣象軒  
昂如野鶴凌空盤旋百折聲迹愈高其感慨悠遠如孽  
子被逐聲嗟氣嘆憂色可掬蓋純乎蘇武之古參乎陶  
潛之雅約乎李白之放該乎杜甫之精諸則如與之同  
堂接膝而相唯諾也不亦良於爲詩矣乎詩之發志之

發也是以善於詩者必善於爲政何者心之平也今之天下有能人焉以案牘之積錢穀之會能畢事爲善立人之朝儋人之爵如假人之寓而去者牖風棟雨一不爲惜其心之憧憧言之庸庸而能爲志乎而能爲詩乎而能爲政乎毋惑乎聞者之不多也君之志宣於詩使山林讀之聞朝廷之盛四夷讀之聞中國之盛後世讀之聞當時之盛其所自立豈淺淺之人所知乎况爲給事中至都給事中前後凡三數年在鎮則柔於所柔剛於所剛號得體在朝則補袞之闕日聞日新號爲盡職善於詩者必善於爲政此固其理也方今天子務平治天下佐翊之任弘貳之責將旦暮集於君之身君必大

倡斯和以啓沉翳而爲一代之音也已然則是詩其殆權輿歟予因讀君之詩樂君之志有成而喜君不與今之有能者同也于是乎爲之序君字與中崑山人與予爲同年進士云

景泰二年夏五月六日劉昌欽謨謹書

開封紀行稿序

文章之與政事蓋一道也故其見諸紀述者卽其形之設施者也第窮達有不同耳唐虞之都俞吁咈載於典謨者事也謂非文可乎孔孟之徒更相問荅以範世立教者文也謂不通於政可乎後世學者不由其道語文章者或專事語言而不足施於事言政事者則馳心於權謀術數而不足達於文于是乎文與政岐而二之而治之不善文之日弊良由此也姑蘇葉公與中由名進士擢官都給事中立朝正色竝言讜論凜然有不可犯前年冬會虜入寇畿甸上分命近臣撫治方岳而公得治河南河南地大物衆公下車爲敷宣恩意民皆晏晏

怙服城守調發裕然以和凡其暇時目之所接山川景物有得於心者往往見之詠歌總得若干首旣竣事歸持以示予俾爲之序予觀公之措詞命意必本之仁義道德肆然如雲行水流畧無凝滯又如穀粟布帛鑿鑿可施之用而感今慨古寓焉視夫嘲風弄月以適一時之樂者詎可同年而語哉信韓愈氏所謂性能而嗜好之者公其是矣予也不佞辱公之知喜公之作且稔公之行事固知其將大有爲於世以爲吾道增重因不讓而書諸卷端尚俾來者有所考見而傳於悠久云

景泰二年夏五月旣望前教授四明馮益識

開封紀行稿自序

皇上嗣位之三月爲正統十四年十一月京師傳言開封陳州流民有弗靖者近臣以聞謂開封毗連鳳陽南陽皆不可無慮于是詔命刑部右侍郎臣耿九疇往鳳陽吏科都給事中臣張固往南陽臣盛往開封各祇奉璽書撫治其兵民相宜從事是月十九日陛辭以行明年景泰改元二月承召還行李往來幾五閱月其間情之所至亦時見諸賦詠凡有所得吏金德輒從旁錄之古今諸體合三百八十有七首釐爲五卷藏之篋衍以埃刪改亦以誌歲月云地之所歷題之所命非一而總目之曰開封紀行者重使事也奏按雜文別有藁三月

一日早見後謹書

開封紀行稿卷一

葉文莊公全集九

崑山葉盛與中著

十一月十九日奉天門辭

翠華風颭駕紆徐戀闕心懸拜舞餘內署特頒千日釀  
北門新草十行書兵民自昔推邦本詢度于今屬使車  
淺薄小臣恩命重無由補報欲何如

通州

迢遞通州路傷心淚幾行西風茅屋破寒日草亭荒健  
婦鉏高壠歸人理舊莊偶從行客問猶說勝良鄉

馬上口號次同僚張公固韻

萬年城闕壯山河奉使初從郭外過回首五雲天咫尺

黑頭供奉受恩多

又

潞河迢遞接灤河歲晚連鑣得共過馬足層冰君莫厭  
中州此去路無多

通州驛夫行

通州城南潞河驛三人下馬思促席入門悄悄無人聲  
滿屋風沙空四壁大家竚立共攢眉自午至未來伊誰  
偶見一翁窺且避不梳不鞮衣離披書吏忽忙喚來到  
含愁帶泣喃喃告兒家本驛上班夫少小當官今已老  
常年在官不在家踉蹌荅應能呼茶眼中看盡承平事  
說著尚可成矜誇祇陪不似偏方比以此常招上官喜

蘭舟桂棹稱絕奇雞臠羊羹詫珍美萬方一統熙春臺  
部符使節星馳來昨朝藩府承恩去今日公卿幹事回  
西域胡僧朝正朔南交計吏呈犀角行三坐五廩給多  
送往迎來禮文數近間忽報邊塵生村墟奔走皆相驚  
小人乘隙爲盜竊亦有點虜來經行什副重裊罷舒卷  
百斛精糧枉輪轉前堂後院近百間算來十日無人管  
幸得天戈一指麾賊徒遠遁鄉人歸歸來此地不堪說  
廳衙雖是繁華非何況從今多應付羽書又名遼陽戍  
驛官自料不能支絲鞭挂向庭前樹少年驛吏無能爲  
逃避不識何所之船頭館伴動百數可憐存歿無能知  
新除驛官纔上任城中伺候勤渠甚歇關官長六七員

什物鋪陳皆借貸分頭送炭不論斤寧知價重雙烏銀  
斗升旋糴米如玉把東貴買桂爲薪艱難百狀言無已  
天遠何由爲陳理不獨兒家小驛夫州上而今亦如此  
軍需物料到手遲坊廂里甲見面稀還家稚子有飢色  
入城田父無完衣合屬人民三十里見說纔回六里耳  
委官絡繹下鄉村四散尋招招未起耿公憂時雙鬢斑  
張君有志濟民艱座中聞此俱慘戚向予不覺成潛潛  
官馬牽來肯容駐安民急下河南去驛夫驛夫錄爾言  
此是觀風起頭處

灤縣遇風感劉給事

清

羊裘之惠

藺人高義解綈袍慰我霜風馬上勞亦有布裘思及物

洛城行見樂陶陶

武清僧寺早起

寒漏曉猶滴王程戒寢興未乘霜下馬猶對佛前燈書  
劍交新卒袈裟別老僧塵沙出門去習靜我何能

東安道中次張公韻

一道霜風曉氣清中原在望若爲情忽忙免得尋詩苦  
祇向征夫算驛程

永清公館卽事

濁油無燄瓦燈昏空館相依紙被溫不信有人當此夜  
絳紗籠燭醉芳樽

贈王顯

開封紀行稿一

三



王郎才思逼高秋二十辭家萬里遊祖硯傳來春藻麗  
父書讀盡夜燈幽美名不羨三珠樹好手宜脩五鳳樓  
客路莫嫌相見晚馬頭明日話綢繆

永清婦

傷哉永清婦慟哭當路岐鶉衣不掩胛亂髮風披披止  
哭拜使者聽妾前致詞妾身本田家生業分所宜婦人  
事紡織丈夫力耘耔今年苦春旱夏雨亦弗時早禾不  
結穗晚豆未成萁園中木棉花坐見青囊萎催徵尚云  
急里保相攀追衣食且不充何以荅公私昨朝紫荊破  
達賊紛東馳妾身纔五口生死各分離夫君冒白刃戰  
死城南陞大兒應民壯還家杳無期阿婆攜幼女奔逐

知何之不獨妾家苦里巷多如斯死者勿復道存者皆  
驚疑十室空八九偷生且流移亦豈永清民鄰郡尤堪  
悲訴天高莫應叩地厚莫知天運苟如此艱難奚足辭  
而獨抱區區請以人事推常年事粟帛寧免寒與飢辛  
勤給公家何曾少違遲上以養國士下以足軍資侵陵  
不能制養兵果何爲養賢望有濟不聞起顛危愚下獨  
何辜蒙禍至若茲諒由妾命薄敢言與怨咨所賴天子  
聖撥亂英雄姿扞禦求衛霍變理登周伊潛回上天意  
大振窮邊威妾身雖夕死寰中樂恬熙懇懇未及已幽  
咽仍漣洏嗟予代耕者聞之心忸怩願以達重閭櫟括  
爲隄詩

霸州公館寒甚對藝呈侍郎耿公九疇

地爐圍坐掃寒灰柴火頻供破屋材堂吏傳呼添獸炭  
尚書此際正朝回

霸州詞

東鄰西舍乍還鄉敗壁頽垣倚夕陽過客相看莫相笑  
涿州城裏更淒涼

文安縣北早行

行行曉戴星村塢復郊坰馬跡循平坂雞聲隔遠汀霜  
寒髯易白風急淚仍青却愛茅茨下普騰正未醒

大城早行次張公韻

孤館無眠候啓明冒寒騎馬出郊行驅馳不忝皇華使

定見流離頌太平

青縣書事

大車牛駕小車推十丈塵中轉怒雷滿載不知何所有  
征南頭目領軍回

二

騾馬紛紛盡渡河百夫相挽苦奔波縣官猶自歡相語  
今日元非往日多

興濟道中次張公韻兼呈耿公

璽書遙捧下中州報國勤民老未休馬首更憐詩句好  
明珠顆顆價難酬

有感用滄州察院壁間韻

九重城闕起龍樓中有何人壯士憂寇鄧中興光後漢  
召方北伐佐西周丹青留得身先退風俗淳時願始酬  
自古熙豐異元祐可堪今日喻乘舟

將至南皮縣

落日明遠川蒼烟起層巘驅車一何遲假館諒非遠悄  
悄客子思勞勞僕夫輓頗傷行路難况值歲年晚詎敢  
望賢勞所幸忘息偃今夕南皮宿翼日東光飯

長至夜東光公館客懷

青綾如鐵夢模糊爐火寒銷燭影孤貽樂堂中歡永夜  
不知能念遠行無

賀冬至

小邑逢佳節懽呼祝聖皇祥風思曠蕩化日運舒長消  
熄須讒佞登崇必俊良遠臣心最切載拜有卷章

吳橋察院與朱御史

永寧夜話

君行自廣川我來自燕山千里川途分會面良獨難孤  
城下殘漏驚風生夜寒相對不成歡流淚一闌干官政  
歎隳替民事陳艱難治安有嚴命我惟羞素餐規哉各  
勤勵無爲遊子顏

德州與耿公別

耿公今之人古人豈殊調鏗鏗金石心凜凜冰霜操發  
跡黃門郎治體已浚造階升歷年所明刑弼邦教久暨  
行弗渝中外聲偕好竭來同奉命聯鑣出官道追從旬

日餘昕夕賴傾倒民隱共諮諏文義亦探討茲晨歛分  
離解囊貫青醪朔風振羣木嚴霜下白草川原眇南北  
惜別心燥燥丈夫志經綸朝廷躋耆老贈行豈無言爲  
霖起枯槁

有感

龍沙無路從鳴鑿慚愧頻年食大官昨夜夢中猶侍宴  
樂聲聽得殿前歡

二

賢科清秩起朝端身荷深恩欲報難江海茫茫人獨去  
一回思憶一沈瀾

故城道中次張公韻

中州民庶久傷殘同日承宣下九關此去仁恩須曠蕩  
陽春有脚本非難

又

風日蕭蕭逼歲殘同行不覺路間關據鞍底事渾無語  
白雪陽春和最難

甲馬營驛夜坐次張公韻

長途何事苦營營寄重安民荷聖情環珮辭朝纔十日  
馬蹄將到大梁城

武城侍郎致仕王公

士嘉見過

八十南宮老居閑養性靈世科傳桂籍陰德著槐庭愛  
國心恆赤憂民淚最青相過陪晤語不負想儀刑

將至渡口驛次張公韻

河上人家帶官驛客子入門催接浙望中何處是臨清  
五十郵程走今夕

早行有懷同僚諸公

水上寒烟接曉雲肩輿聯發路平分川原樹色高低見  
屯堡雞聲遠近聞親捧紫泥思報國暫辭青瑣惜離羣  
通明殿裏諸同事正接班行拜聖君

已巳歲

集古  
二十首

上皇行處不曾秋一上高城萬里愁聞道全師征北虜  
等閑期尅月氏頭

二

鵬鵠泉上戰初歸日暮驚沙亂雪飛邊將皆承主恩澤  
誰能談笑解重圍

三

將軍歸臥玉門關烟火相望萬里間豈有蛟龍曾失水  
對君衫袖淚痕斑

四

戰敗桑乾日色黃望仙樓上望君王山川無處無歸路  
猶自音書滯一鄉

五

壯士悲歌易水秋愁心一倍長離憂可憐荒歲青山下  
對泣風前類楚囚

六

上皇曾此駐泥金清渭東流劍閣深鳳輦不來春欲盡  
玉書應念素塵侵

七

聞道新亭更欲過不知經世竟如何金輿玉輦無行跡  
怨入東風芳草多

八

龍輿西幸水滔滔却算遊程歲月遙添得五湖多少恨  
詔書前日下丹霄

九

黃昏胡騎塵滿城更堪江上鼓鼙聲人心不似經離亂

還待中原致太平

十

此地曾經翠輦過微風落日水增波誰言水是無情物  
流入深宮恨更多

十一

愁雲漠漠草離離夢見君王覺後疑此日六軍同駐馬  
寧無一箇是男兒

十二

清談空解識胡兒黃鶴樓前吹笛時曲突徒薪人不會  
可憐蜂蝶却先知

十三

旅館寒燈獨不眠  
心隨明月到胡天  
須知此恨難消得  
只是當時已惘然

十四

誰道君王行路難  
迢迢西塞望東關  
天旋地轉回龍馭  
親從新侯定八蠻

十五

玉帳連封萬戶侯  
安危須共主君憂  
誰知我亦輕生者  
要與中原靜寇讐

十六

一涕闌干白角巾  
誓將報主靜邊塵  
將來爲報奸雄輩  
不見沙場愁殺人

十七

紫陌紅塵拂面來  
爲銜君命日遲迴  
平生志業匡堯舜  
不斬樓蘭擬不回

十八

意氣兼將身命酬  
麒麟錦帶佩吳鉤  
堯將道德終難敵  
虜騎相看哭且愁

十九

畫戟雕戈白日閒  
縱金伐鼓下榆關  
報讐只是聞嘗膽  
不放沙場匹馬還

二十

年少英雄好丈夫  
西風吹入小單于  
歸來不用黃金印

高挂一帆歸五湖

經石佛寺

野寺暫停驂清心見碧潭寶香燈與靜山茗棗同甘拔地石為佛繞檐雲作龕主師非絕俗呵凍寫和南

梁舉人文輝

昱

回寄家書以遷秩報至臨清聞

梁途中覆舟書亦亡去因復作書

一紙斜封抵萬金故人何事竟浮沉匆匆已負臨風語耿耿空懸步月心遷秩昔曾勞薦牘乘輅今復拜綸音客窓重寫平安字悵望孤雲淚滿襟

夢姚

銑

鮑

輝

二同僚

姚

候

官

人

鮑

溫

州

人

皆

從

征

歿

禁闥交游誼獨淡清操博學重儒林從龍萬里無消息

昨夜分明夢裏尋

二

浙河南去是閩山歸路微茫未得還何事匆匆相見處傷心祇是問龍顏

三

夢回清淚不勝零國士恩多出漢廷皇恐未能酬一劍故人知我負幽冥

館陶小憩廣福寺

里埃登登去路賒肩輿暫息梵王家老禪留客能分榻童子逢人旋煮茶松下齋厨無野馬案頭香燼有楞伽出門却笑飄蓬者雙鬢西風日又斜



登大名故城

百里荒城瞰水涯當時盟好已堪嗟高瓊寇準今何在  
疎柳蕭蕭集暮鴉

謝佑王偉二御史酌別後寄

驛騎凌寒日下來相逢懷抱爲君開閑評士檢真相益  
細說民艱正可哀王導豈無經世畧謝安元是出羣才  
輿圖一統非江左早使殊勲列上台

內黃周源知縣父挽詩次抑菴尚書王公直韻

屹屹穹碑字未昏九原牢落舊精魂猶存松菊何人賞  
初發芙蓉有藁存聘士漫勞尋北郭移居不用築東屯  
泥田自是君家世江水西來第一村

濬縣

行盡銅臺境渾忘道路長里人通餽遺田父話豐穰桑  
棗家家屋牛羊處處莊北來稀見此志喜一成章

淇縣

淇水息鳴鑣行歌慰祇役愴然懷昔人如金復如璧箴  
儆忘耄老悔過戒伐德若人不可見凍雨灑寒簣

殷少師比干廟墓

悠悠東逝河靡靡南淇路有歸若堂封云是太師墓停  
車歷莽蒼載拜淚如注念昔殷毒痛臣人總非度天命  
誅貫盈周師誓西土維時偉三仁直諫期悔悟彼昏仍  
作威拒飾肆沉酗父師旣佯狂王子亦亡去先生重親

屬死爭忘忌顧批鱗亦云危剗心一何怒後來赫宗周  
原頭表封樹陂陀一方石西風幾顛仆凜凜諒斯存忠  
誠光竹素如何百代下奸佞不知數

傷流民

白叟黃童哭且扶牛車轂轆滿長途監門鄭俠今誰是  
重遣流離入畫圖

衛輝府

集古

每因風景却生愁滿眼青山過衛州歇馬獨來尋故事  
夕陽惟見水東流

同王

玉

御史閔武時王以翰林脩撰改職

旭日曈曈照鐵衣鳴笳疊鼓馬如飛玉堂仙子烏臺客

貔虎三千屬指揮

宿新鄉

孤館坐來靜悲歌祇自傷鄉心將恨遠客路與愁長葉  
落風鳴砌蛩吟月照牆出門瞻斗宿彷彿見君王

渡黃河

征騎駢駢到水涯西風獨立動遐思百年塵世有窮事  
千古河流無盡期已見朝宗趨大海更聞清碧應明時  
經過自笑萍蹤客喚得官船只恨遲

陽武懷古

蕭蕭官舍解征鞍便覓圖經子細看宰社也應推孺子  
築城端合怨曹瞞往年州治荒基在近日河流故道安

自是茲行爲民俗不須懷古思漫漫

錄陽武老人語

從來陽武近黃河巨浸年年沒燕窠八柳樹頭衝決後  
人家盡種好田禾

二

淺淺浮沙壅濁流舊河通不到徐州黑陽山北金龍口  
疏鑿年年未得休

將至開封口占

倦僕走跋跋西風道上塵望中青一色知是遠迎人

開封紀行稿卷一

葉文莊公全集九

開封紀行稿卷二

葉文莊公全集十

崑山 葉 盛 與中著

十二月十二日大梁公館作

駐節汴河東征袍振晚風龐眉迎衆老高蓋集羣公問  
俗知淳古安民喜屢豐行蹤猶未已歎語亦匆匆

開封懷古

夷門山下駐鳴珂對景傷情可奈何古寺風霜摧鐵堦  
前朝宮闕臥銅駝春歸艮嶽林花發日落繁臺野鳥歌  
試上故城高處望大河東去浩煙波

二

梁苑梁山似舊時梁王賓客竟何之小黃園上秋風老

凝碧池頭夕鳥遲此日北征端可羨當年南渡已堪悲  
誰知衰草寒烟裏亦有明昌進士碑

送高瑛進士還朝次黃員外廷獻琛韻

東西岐路正迢遙幾度逢人寄采謠鵷序久分宣政殿  
馬頭相見洛陽橋尋常客况憑書達多少離愁仗酒消  
別後有懷應似我一燈孤館夜寥寥

汴城八景

艮嶽晴雲

尋常五色護重關况復春晴萬歲山道是無心還有意  
慣爲霖雨到人間

大河春浪

紅船灣裏浪滔滔知是崑崙雪盡消多少魚龍變頭角  
海門東去若爲遙

開寶晨鐘

疎星牢落斷河橫又聽蒲牢吼怒鯨百八聲殘南寺裏  
萬家烟火起春城

夷山夕照

好山偏與晚相宜落日斜明樹杪時登覽未窮千里目  
斷霞歸鳥總成詩

金梁曉月

月光如水水平橋滿地霜華作雪飄多少行人望城府  
雞聲馬色共蕭蕭

資聖薰風

層霄傑閣礙雲流倚遍闌干亦勝遊欲向南風歌此曲  
清陰分却滿中州

百岡冬雪

六出瑤花一夜開岡巒無數白皚皚登高欲紀豐年瑞  
誰有梁園作賦才

吹臺秋雨

百尺崇臺俯水涯秋風吹雨漫斜斜更逢晴日須乘興  
莫把閑情負菊花

張公按事南陽有詩留別次韻送之

同領綸言下帝州汴城分手漫綢繆年登不用陳紅散

世難無勞大白浮夜渡洧河殘雪在曉行豐嶺暝煙收  
臥龍岡下停車處清淚應多逐水流

陳留懷古

小縣巡行亦勝遊懷賢何處訪留侯人家簇簇雞聲午  
客路悠悠鴈影秋百里故都名尚在千年陳跡水空流  
翻思昨日延州路博浪沙頭說報讐

伊尹

省方下留邑懷賢重阿衡寤寐堯舜理辛勤畝畝耕匹  
夫任何重三聘意已誠弔伐南巢舉惻怛桐宮情元老  
一代尊大訓千古明茫茫有莘野坦坦空桑城人遠跡  
已蕪稽首仰修名

杞縣懷古

曉發雍丘月滿天雙旌隱隱馬翩翩  
鄴商墓下誇前事祖逖祠前恨昔年  
汴水亂流春似海隋堤不斷柳如煙  
淒涼幾許興亡恨付與行人一惘然

郵亭

十里官程一置郵也通司府也通州南來北去何曾住  
不管行人白了頭

睢州懷古

西陵行盡復東陵懶向征夫說廢興  
幾陣晚風沙浩浩一川寒日樹層層  
種桃洞口將殘雪濯錦池頭未泮冰  
下馬行臺宵柝起坐窮今古自挑燈

示李孟陽

之子睢陽彥霜臺獨擅場陽冰工字畫太白好文章  
一第非難事羣經是古方盛年須努力天路看翱翔

校武

麗譙高起曙光遲將士桓桓校藝時  
十里風聲喧鼓吹四郊霜氣濕旌旗  
從教將略窮神算須使皇威振遠夷  
多難未平讐未復據鞍重詠有嚴詩

有懷盧同知

名熙洪武初爲睢州有惠政

文章老守鄉先達佐郡當時擅好才  
不是睢人渾不識百年耆舊已塵埃

寧陵懷古

萬里中原屬壯遊沙隨小邑駐鳴騶信陵一去豪華盡  
褒聖重封世澤留碭郡已從前代改汴河還遶故城流  
魯公盟會知何處衰草寒煙總是愁

紀夢

北望老親雙白髮南還病婦一孤舟夢魂兩地相逢處  
盡說行人愛遠遊

儒官有他請者

師道當自重官箴何可違清風灑車騎勿爲高人嗤

歸德懷古

商丘民俗已熙熙訪古寧無感昔時老守未新微子廟  
小兒猶唱木蘭詞西風古渡蒼煙積落日荒城畫角悲

最恨隋堤千樹柳一番春雨一低垂

協忠廟

卽古雙廟今合祀霽雲等故名

張巡

戰血年淡化紫苔寒鴉枯木廟門開尋常烈烈風霆起  
疑是中丞罵賊來

許遠

太守睢陽死洛陽捐軀豈復問何邦忠良尚有紛紛議  
羞殺偷生與請降

南霽雲雷萬春賈賁姚閻

桓桓南八好男兒賈尉姚雷天下奇三十六人今有幾  
簡書猶爲惜當時

校武

峒堯百堞古睢城校武遙從郭外行鐵騎擁將威凜肅  
玉驄嘶過氣崢嶸陰風獵獵旗旄動初日蒼蒼劍戟明  
試語太平諸將士中興天子未休兵

火星廟

闕伯祠連帝營陵春風惟見燒痕青白頭田父無知識  
簫鼓年年祭火星

柘城懷古

此日株林駐客旌無邊風物總關情浮丘觀裏花爭發  
安漢墳前草又生官道幾程通大邑人家一簇住荒城  
晚來平麓牛羊下最是淒涼有笛聲

夜坐書簡秀才曹本持寄孟激訓導

旅館高吟獨愴神蕭條空壁與誰鄰憂民有諂煩明主  
酤酒無錢失故人爐火尚溫霜氣肅篆煙不斷月華新  
寒更數盡偏增感千里江南憶老親

太清宮廢址

宋真宗  
所幸

老子祠前歎劫灰天書何事不重開傷心惟見青青草  
曾襯當時玉輦來

鹿邑懷古

縣城曉發候鳴雞野店蒼茫路尚迷月滿洛河烟漠漠  
風生龍井草萋萋閑看趨集人爭渡厭聽逢春鳥亂啼  
古往今來何足問漫將高興入新題



代贈別 集古

青春衣繡共稱宜  
匹馬寒嘶白露時  
聖主分明教斲去  
留君不住益悽其

二

因拜王門最好官  
紫宸朝罷綴鴛鸞  
如今送別臨溪水  
酌酒與君君自寬

三

贈君空有淚沾衣  
回首川長共落暉  
休唱貞元供奉曲  
由來此曲和人稀

荅贈別 集古

遠別悠悠白髮新  
瑞香烟露濕衣巾  
侍臣鵠立通明殿

遙想風流第一人

二

先達誰當薦陸機  
惠連羣從總能詩  
中原莫道無麟鳳  
今日河南勝昔時

三

玉珮成行引上公  
偏承霄漢渥恩濃  
行人本是農桑客  
只合終身作臥龍

宿是量鎮民家

土屋假幽棲  
田翁款語低  
年豐探客喜  
夜靜怕兒啼  
趨集初歸擔  
勤耕夙具犁  
五更催客去  
喔喔柵中雞

陳州懷古

路入淮陽景物稠西行不盡古今愁千年鐵墓沉淶水  
百里金城接宛丘曲曲蔡河渾似舊行行隋柳不禁秋  
停驂正爾傷情處無奈哀笳起驛樓

州衛盛迂却之

春風供張爛相輝馬足車塵去路微隱隱檐帷迎曉月  
煌煌檠戟麗晴暉終慚黎尹存騶從還笑王郎事橐衣  
清苦書生本寒族眼看流俗與心違

臘日懷同行二公

集古

臘日常年暖尚遙天涯霜雪霽寒宵主恩前後三持節  
人事音書漫寂寥

卦臺

羲皇本神聖御寓三皇初茫茫大河上龍馬出負圖一  
云蔡水陽亦有龜瑩如聖心與天契奇文昭軌模七六  
前後列八九左右俱由茲啓後聖大易遂以敷維陳有  
遺臺下見靈著枯偉哉方冊存萬古開羣愚

厄臺

宣父大聖德遭時一何迤歷聘志靡合周流道逾淪旣  
傷見蜚鴈絕糧復于陳愠見弟子行固窮訓諄諄歷山  
想同調羨里與之倫昔人皆處困奚必傷苦辛我行越  
故國崇臺已荆榛斯道幸有託廟饗垂千春

次楊司丞贈別韻

行時楊司丞叔簡藻以詩贈別憂民之誠愛願之意

溢乎言表茲行陳州覩民物之恬熙念故人之雅厚  
喜而成章次其韻焉

東風按節古陳州最喜清寧絕運籌遠鼓鼙田祖社  
短旗颭颭酒家樓已將恩澤安民俗共荷陽春散客愁  
天上歸來應有日詩盟重與故人謀

二

盡說中州慶有年繁華况復汴河邊絃歌夜永承平日  
花柳春明近午天牧子遠歸芳苑外遊人多駐古臺前  
也知聖主開昌運坐使蒼生樂晏然

除夜

爆竹遙聞也自憐官曹明日是新年一從使節來天上

久乏鄉書到鴈邊歲晏高堂雙白髮家貧空壁一青氈  
非才何補不歸去挑盡寒燈只泫然

同陳御史維藩价守歲

客邊逢故舊今夕喜追陪新歲明朝是行人幾日回莫  
思身外事且覆掌中杯共待履端賀城頭玉漏催

景泰改元元日

天子龍飛第一春履端偏喜賀芳辰輿圖不改山河舊  
曆日重頒歲月新統正臣民應共仰功高夷狄已咸賓  
內班端笏馳心極想見鵷行覲紫宸

元日雪

三呼嵩嶽拜新正六出飛花滿郡城暖逐東風吹臘去

兆占豐歲足秋成素華已混瑤階色颯沓仍隨玉珮聲  
擬罷椒花歌白雪可憐郢客好才情

元日客懷

高堂今日燕椒花和氣融融自一家白髮有人心獨苦  
酷憐遊子在天涯

有懷刑部張穆陳璉二契兄

張君亦豪俊平生次公比語高動羣公文雄壓諸子  
靄崐丘雲悠悠石川水幽期諒如昔相望邈千里

二

器之東婁秀超然見孤騫滄溟况淡廣良玉擬清溫  
論交繾綣情臨分慷慨言久要苟無負遠別奚足論

有懷孫

瓊

進士

時孫在選

孫郎尚年少卓有跨竈風寤寐古之人相期躡高蹤  
清冰慎所操貞松表直躬懸懸匪私故區別望山公

太康懷古

邑有五子臺

寂寞荒臺俯舊河當時遊獵竟如何王綱祖訓言猶在  
峻宇雕牆恨已多一代衣冠歸土壤百年風雨長蓬科  
嗣王好作無窮戒看取遺經五子歌

名臣顧都御史

佐

王侍郎

淪

皆太康人顧卒已

久聞王亦在病中愴然興懷

我皇當日重才良二妙連翩出太康南國一時沾化雨  
中臺六月凜飛霜激揚有疏存家集貧病無錢置藥囊

嵩洛耆英已消歇鄉人多少慕餘光

勉王節侍郎之姪

愛爾名宗裔傳家守一經時文無舊習古學有新銘赤汗千金骨丹山五采翎好才期不忝拭目伍喬星

憶廷獻時廷獻在洛中

自入春來百感增詩囊羞澀似無能也知今日銅駝陌花鳥多應哭杜陵

雀橋道中

綠幘繁華子雕鞍窈窕孃誰家拜年去歸路已斜陽

汴路水驛王仲初韻

春水河邊驛孤帆落曉風人行白雨外鳥下綠蕪中官

道還從北鄉心常在東寥寥一尊酒千里與誰同

汴路卽事前人韻

不識汴河路悠悠幾許長故宮傷往事孤客厭他方到處逢津吏常時見海商若爲流落久天上愧朝行

通許懷古

梁王宮闕異前時小邑依然繞故基舞影歌聲渾索寞水光山色正參差東風草綠賢人墓落日鴉啼聖女祠自古豪華隨物化不須懷古漫題詩

維藩晚過

驄馬翩翩繫夕陰幾多清話別來心相知不忍輕相別驚見寒燈照夜淡

有懷朱先生

函菴師嘗爲通許教諭今鎮海太倉教授

行行許叔封民俗樸以淳下車見諸生惕然懷哲人通材今亦罕善教古之倫棄遺惜奇寶獻納叨近臣內媿發長喟引領東海濱

所至宣諭流民有作

昨日黃河北道逢流民淚沾臆今日河之南往往視之無不堪河南沃野聞天下穀賤今年不論價穰穰廩積百萬家半是流民寄居者流民本自出逃亡移家就食來多方夫耕婦織久爲業男婚女嫁森成行保養何人善區畫高門司馬年方伯節菴侍郎于公謙布政年公富招徠編籍費心思爭許紛紛皆帖席朝家近日事如麻差科肯入流

民家况復中州稱樂土不聞調發向胡沙我當安撫傳天語親向閭閻久延佇九重明聖愛齊民蕞爾逋逃尤念汝古來仁義當並施中興今日先恩慈嘗聞獲福在知報飽食毋忘枵腹時君不見黃河頭河南禁渡河北愁轉徙未知何日休

開封紀行稿卷二

葉文莊公全集十

開封紀行稿卷三

葉文莊公全集十一

崑山 葉 盛 與中著

正月初六日還至開封

廿日開封路馳驅遍邇清寧行客穩豐稔細民誇沃壤圍千里炊煙起萬家封章寬聖慮早晚達京華

思家操

吾家自中葉以來舊物蕩盡今僅存先五世祖遺囑契文并燒劫圖等皆延祐至正間手蹟也比留於京行時不得已緘固託故人陳汝成者護藏之耿耿在心作思家操

我所思兮鬱以紆吾家之寶今天球河圖自我先公兮

後人是模不食不寐今爲有爲無嗚呼憂乎吾家乎有  
大於此兮何如吾憂乎

折楊柳吟

柔條嫩葉雨兼風如訴如啼恨不窮記得六龍巡狩日  
翠華遙駐曲闌東

二

碧桃紅杏正茸茸乳燕鳴鳩趁曉風馳道邊頭數枝柳  
暗舒青眼望重瞳

人日偶成

情緒向來非往日况逢人日在他鄉分羹剪綵知誰健  
拔劍彈琴祇自傷風雨無情春漠漠江湖有路恨茫茫

百年身世成何事慙愧題詩寄草堂

腐儒

激烈手中三尺劍瀾翻筆下萬言書少年心事多虛負  
獨立東風笑腐儒

同王都御史來觀校武

演武郊南屬早春喧喧笳鼓下城闌韜論豹犬須無忝  
陣列風雲信有神主者不妨揮白羽藩侯寧惜擁朱輪  
從來盛世難忘武况復朝廷久臥薪

貞節堂爲宋婦石氏作

番陽丞某之女教諭原用之妻河南參政琰刑

科掌科給事儒之伯母  
羅山教諭慶祥之母

君不見貞節堂堂中老人壽而康堂前綽楔生輝光憶



昔紅顏正年少夫君永棄番陽教臨訣丁寧重首丘間  
關萬里從佳兆春花秋月意何如鉛華冷落粧奩虛尊  
章終養供婦職孤子提攜收父書孤子學詩兼學禮仕  
路先登見難弟承家已喜守青氈養志還看分祿米有  
司列狀聞九重旌書特下明光宮從此高堂揭華扁史  
官有述垂無窮盛福榮名何可得豈但閨門足矜式藩  
垣瑣闥有諸郎名家亦自增顏色我歌此曲扶綱常癡  
頑最鄙馮瀛王肯將女婦輕孤孀君不見貞節堂

不寐

樓鼓頻更燭漸昏驚風落月掩重門夢回尚覺餘酣在  
獨抱寒衾欲斷魂

再代贈別

集古

獨立敢言人所難君行當得遠人歡他年謁帝言何事  
社稷蒼生計必安

二

常日相隨說道情看花多上水心亭行人莫問當年事  
舊事淒涼不可聽

三

對君疑是汎虛舟遙望旌旗汝水頭年少功高人最羨  
諸生喜遇一封侯

四

玉山高並兩峰寒孝子忠臣後代看誰遣同衾又分手

明朝相憶路漫漫

答贈別 集古

木北原南草色新東家流水入西鄰時人莫笑非經濟  
活得蒼生幾戶貧

二

手持黃紙到滄洲遠道逢春半是愁遙羨枚臯扈仙蹕  
朝朝染翰鳳池頭

三

楊柳青青江水平蕭條獨向汝南行勞君故有詩相贈  
不及汪倫送我情

四

春草青青萬頃田萬家烟樹滿晴川寄聲報爾山翁道  
多說明年是稔年

早發封事 三首

奏復撫民官

分定職乃安任專事靡失矧茲有著令紛更亦奚必不  
見曹參相斯民以寧壹

奏去老疾官

百職重脩輔况乃多故時進退固有道止足當自知堂  
堂藩府居養病誠非宜

奏改隸軍衛

兵以衛民設厲民非令圖撫治在統馭吾人焉可誣維

茲要害地杜漸更防虞

四明宋子昇思訓堂 儒父

慈母仙遊若箇邊紫護花發又經年斷機憶得當時訓  
一度登堂一泫然

調嘯詞

白日白日東出西飛太疾少年獨惜光陰分寸工夫苦  
心心苦心苦一日神遊萬古

又

啼鳥啼鳥靜裏聽來自好暖風晴日悠揚野草開花斷  
腸腸斷腸斷春與酒杯俱滿

立春日試筆

團團晴日曙光遙殘雪都從昨夜消生菜未誇延上客  
土牛先賀出東郊

二

朝廷有道恩波濶歲月無情鬢髮凋最是柳條生意好  
東風搖曳赤闌橋

登相國寺資聖閣

畫構凌雲起乘闌寄客蹤淒涼千佛供颯爽八窓風寶  
地微茫裏平原指顧中憑闌見孤墪因慕昔人忠

謂田錫

元宵感懷

十載元宵不在家半於羈旅半京華寂寥不似今年甚  
坐對寒燈看落花

去歲今宵孝義坊阿翁呼酒勸諸郎生離死別愁何限  
吟對花燈泣數行

詠金環

體圓初法天色赤還象日幸與儒冠伍白頭不相失

晚眺偶作

掬流水兮澄源望西山兮如畫彼美人兮不來阻盤桓  
今嘉話

讀韋應物感事詩惜其絕物太甚乏長厚之風  
因借其辭以反其意

素絲一何素皎皎如雪霜墨池本他物誤使失晶光烈

火尚可浣澣濯豈無方去僞返初質重爲君子裳

張公歸自南陽

談笑相看慰索居故情無限未全疎論心每荷忘年少  
分手俄驚近月餘欸欸數行沽到酒盈盈一束寄來書  
人生會合非常事况是同乘使者車

悲歌

有客有客字與中長身玉立聲如鐘平生志薄侯與公  
國恥未雪氣塞胸手中三尺蒼精龍淚血灑天天爲紅  
嗚呼一歌兮歌未終兩耳霍霍吹剛風

有女有女美如玉少小隨兄把書讀閨門禮度如老成

夜出教人秉明燭阿嫂久病弟尚孩此際相將向天哭  
嗚呼二歌兮腸欲斷遊絲百尺空中亂

有子有子麒麟兒呱呱未絕才及期汝兄八歲卽棄我  
望汝長大收書詩淚眼相看抱將去却憶城南臨別時  
嗚呼三歌兮轉悽楚荼蓼參連未爲苦

四

有妻有妻如孟光十年辛苦同糟糠男呻女吟病在床  
高堂何人具羹湯生別展轉那可當死別有言應不忘  
孺人別時國難未解  
有各保盡節之語嗚呼四歌兮歌正長四座爲我增  
傍徨

五

有妹有妹淑且貞月圓玉潔蘭芳馨前年哭子心惻惻  
良人少年家未成風塵未息憂恨并貧與病兮嫂與兄  
嗚呼五歌兮清淚零望望南天空復情

六

有弟有弟英妙年讀書無成我所憐奔波慰我羈旅邊  
凌兢自踏南歸船使我日夜長憂煎看雲聽鴈幾茫然  
渴心欲塵眼欲穿嗚呼六歌兮情莫宣安得兩翼飛去  
墮爾前

七

有兄有兄力農圃祭養關心仍嫁娶年荒無收百不辦

老大勤渠應門戶脊令在原胡不歸道路崎嶇尚豺虎  
嗚呼七歌兮歌思遲友生滿前知不知

八

有母有母繼吾母賢名淑德光前後盈盈一篋寄來衣  
想見縫時不停手慈顏憶別五經春再拜何由奉卮酒  
嗚呼八歌兮心孔傷青天無雲白日光

九

有父有父髮半華醉吟不入州官衙平生教兒忠與孝  
浮華下視如塵沙位列諫官無寸補庭闈遠在天之涯  
嗚呼九歌兮寧復道憂思一夜令人老

宋進士護哈密使還國卷補題

卽宋掌科

朝看黃金榜暮發黃金臺問之何因爾使者須奇才邈  
彼越裳氏重譯朝天回送往禮所宜輶車共焯焯黃沙  
亂白草萬里邊城開寄言防關者勿恃遠人來

禽言

行不得也哥哥千言萬語徒爾多手無桃竹足無鞞前  
有荆棘後有河天門高高慟三策江水悠悠傷九歌行  
不得可奈何

二

不如歸去田園將蕪在何處相思相見意中人某丘某  
水門前路牛後何如雞口賢玉顏肯受蛾眉妬不如歸  
日將暮

聞陝西有警

集古

岐山高與隴山連  
馬邑龍堆路幾千  
聞道王師猶轉戰  
何時返旆勒燕然

古意

夫君案頭筆賤  
妾手中綫筆與斧鉞  
俱綫與章服辨君  
看惡者懲何如善者勸

二

君愛垂楊樹  
妾愛柔桑枝  
楊花白袞袞  
桑葢紫垂垂  
君看花隨風  
何如葢充飢

南園十詠爲宋掌科賦

河渠春漲

河渠過春雨  
汙汙漲新綠  
若人灌園暇  
還來飲黃犢

禾黍秋風

涼颼起天末  
四郊熟禾黍  
靄靄臥黃雲  
離離墜秋雨

槐庭清晝

庭槐結重陰  
把卷忘炎熱  
黃花散晚風  
想是忙時節

柳岸晴煙

岸柳帶朝煙  
柔絲暝如織  
惟聞啼鳥聲  
不辨黃金色

葵砌傾陽

薰風動閑堦  
葵心展晴旭  
草木有孤忠  
看花恆自勗

蔬園翦雨

嘉蔬掇芳鮮  
園丁衝暮雨  
爲有故人來  
春盤薦雞黍

曲沼新荷

曲沼漾新荷田田猶未大待得賞芙蓉碧筒分滿座

疎籬叢菊

采采籬下菊秋風作花早何必問重陽有酒卽傾倒

蓬戶書聲

茅茨掩蒼苔吾伊發清響蜚騰入霄漢藏脩起遐想

蘭山雪色

西陲夜飛雪將軍濕氊帳萬里玉爲關况是蘭山上

石大用主事席上

善言大聖好狂藥古人誠所以賓主間鄭重行百拜

春思

春波滿池綠春草看漸生舉頭庭樹間好鳥相和鳴便  
欲尋人語春風如有情

題廷獻詩稿

明珠累辱寄來詩卷裏重看慰所思天寶拾遺終不忝  
元和才子共稱宜愛君憂國三千首賞月吟風十二時  
分付小溪須什襲鏡歌早晚奏彤墀

下令勸借未彌月報至得糧二十三萬有奇擬

荅布政年公

青青麥隴過春分雨雪無多到處聞思患固知義易訓  
賑飢尤切社倉文



朝廷今日脩荒政田里他時仗使君  
閱罷簡書愁頓減  
欲將新曲和南薰

畫竹爲李主事鳳題

我家住近玉山岑山前山後脩竹深  
自從看花走京國  
夢魂遠逐秋蕭森前年倚櫂湘江水  
今年駐節淇園裏  
幾回見竹意何如好比他鄉遇  
知己淇園主人開竹房  
示我鵝溪盈尺長藜色脩脩隱風雨  
孤翠亭亭凌雪霜  
展玩令人歎奇特鑒定應須窮目力  
若非老可興來傳  
定是蕭郎在時得園中看畫稱逼真  
主人此意殊不羣  
他鄉故里何足問但保清風共此君

車遙遙

車遙遙在何處不載行人歸  
只載行人去行人登車臨  
去時不挽鑿鈴挽妾衣  
心中有事道不盡雙輪忽動去  
如飛輪兮一見不復再  
綠鬢紅顏坐成改妾身不及輪  
有情長伴行人萬里行

莫殺虎

莫殺虎虎毒安能入城府  
偶爾殺人猶可數官家有酷  
吏誰敢觸其怒苛政日出嚴刑俱  
妻哭夫兮子哭父莫  
殺虎虎縱殺之亦何補願教虎目如  
明燭虎爪如刀翼  
如蝠飛來復飛去從容攫其肉  
哀哀若兔路人哭便捋  
虎鬚死亦足

簡菴少卿沈公祭南歸至直沽以詩見寄次韻

漢武周宣十倍過中興天子自揮戈萬年寶曆從頭閱  
三尺龍泉帶血磨受命昔聞天下趙得賢今數禁中頗  
老臣一點丹心在化作滔滔海上波

春詞

陰壑將無凍銀塘尚有澌眼看雲作陣怕是北風吹

二

菜葉長新薑春醪初發醅小齋生意好不見故人來

三

春色相將半懷思獨倚闌傷人話冰雪毛骨自生寒

四

踏却堦前草朝來復滿堦待看齊尺許來此鬪金釵

公館後壁十八學士九老二圖歲久昏翳洗之  
莓苔洗盡見青紅從此遊塵不敢封湛湛瀛洲唐盛世  
雍雍洛社宋名公一時賢德推司馬百代綱常薄敬宗  
畫史於人豈無意每因公退立從容

汴梁城同維藩廷獻張公登城作

汴梁城城何高白石爲隍黃河爲濠如金如湯百里周  
遭城中千萬家萬家樂陶陶我思築城時千人萬人築  
且挑不比舊城築不牢粘罕砲落都人逃至今黃土生  
青蒿爲語守城人脩護賴爾曹昔人城此百倍勞

人齊郊柴桑圖爲曹僉事

璉題集陶

性本愛丘山息駕歸閑居草屋八九間遶屋樹扶疎窮

巷寡輪鞅委懷在琴書人生歸有道誰謂形跡拘良辰  
入奇懷好風與之俱遠我違世情摘我園中疏班荆坐  
松下棲遲固多娛秋菊有佳色春醪解饑劬菊爲制頽  
齡過此奚所須酒能祛百慮不樂復何如遙遙望白雲  
慨然念黃虞

蘭竹小景

空谷蘭猗猗亦有脩竹枝君子並佳人風味兩不疑蕭  
艾不敢伍棘心寧爾欺

劬書齋爲高翔題

齋居謝雕績門第清囂誼中有讀書人悉力窮道源渾  
渾百篇義浩浩六籍文味腴意逾悅嗜炙志彌敦進脩

旣不懈自得諒斯存彼哉膏梁子逸樂竟朝昏豐屋一  
以摧淪落誰復云先哲有遺訓惟業精於勤寄言讀書  
人此道永勿讓可以躋聖域功名奚足論

貢院有感

重門淡鎖郡城邊駐馬閑來已惘然文字漫憑三日內  
情懷猶記五年前威行邏卒循牆棘名擁先生中選錢  
多士若爲稱濟濟成周時節重興賢

憶昔 十首

早朝

銀燭光搖曙色新禁城無處不陽春梯航貢入窮山海  
文武班齊列鳳麟日馭自應歸日表宵衣誰遣進宵人

朝朝鵠立成何事一度聞雞一損神

午朝

講筵纔罷御筵開又報沉沉午漏催雲氣遠隨仙仗出  
日華斜度順門來咸和本是君王志獨對寧無宰相才  
北望榆林春欲暮不知鑾輅可曾迴

導駕

華蓋前頭王氣浮數人先到得遲留仙山隱約三千里  
袞冕分明十二旒虎拜盈朝瞻日月龍行匝道擁貔貅  
乘風幾度歸青瑣踏踏天香過武樓

記事

九重仁聖慕昇平常日臨朝對老成才薄自慙居右史

官閑偏得侍西清繡裳挺挺承殊渥玉旨行行出至情  
回首御前驚半載北風何處望霓旌

時享候駕

淑景沉沉午仗移御香浮動滿龍墀錦裝馴象相將引  
玉勒名駒不用騎七廟雍容周典禮千官踧踖漢威儀  
清醕廣牡多恩賜瑣闥當時出每遲

南郊供事

合祭年年大駕移紫壇秋夜亦多儀麗天日月當金輦  
出海雲霞晃繡旗二帝有靈開景運百神無斃降繁禧  
極知聖德符玄象和得周朝右享詩

經筵侍儀

曠曠初日麗文華朝下重關靜不譁諸老從容趨玉几  
一人端拱駐雲車有卷大雅全歌詠無逸終篇幾歎嗟  
已得十回親對御天涯今日向人誇

慶成侍宴

丁卯年中忝近臣曾歌天保荅生民御筵開得花偏好  
仙掌分來酒自醇衛士盡持金麗歛從官多著繡麒麟  
最先知得君王喜咫尺天顏日月新

海子從狩

田獵三驅愜素聞依稀憶得從明君五軍萬馬嘶晴日  
一箭雙鷗落曉雲聖比殷湯非好武賦如楊子足爲文  
行營到處隨恩澤自縮青絲與客分

端午被賜

角黍堆盤讌玉墀端陽嘉節正當時朱衣內史頒輕箑  
白面郎官散壽絲共沐天恩同發育總知臣節効驅馳  
却憐今歲龍沙北誰向南薰獻一卮

夜坐呈廷獻

戀戀熏金鴨泠泠韻玉琴如窺古人面爲識古人心

使司二詠

喬木陰森九夏寒前堂高處綠雲攢大書淡刻堂中柱  
盡是金源考試官

二

繡闥雕甍面面開後堂淡處絕塵埃丹青尚在堂中壁

曾見朱溫御座來

送廷獻還朝就用見寄韻

官曹崇重少人來，慰我惟君笑口開。  
看舞青萍朝下榻，聽歌白雪夜停杯。  
諸峯覽勝曾同約，一騎乘春竟獨回。  
拜命也知非久別，駕行有待共徘徊。

二

梁園春色馬行遲，西去聯鑣未有期。  
客裏相過憐我病，天涯爲別使人悲。  
江村竹葉頻沽酒，驛路梅花好寄詩。  
欲識懷思在何處，兩鄉明月坐支頤。

三

殊方相見託交知，又逐征夫泣路岐。  
汴水冰霜添積恨，

繁臺烟月負幽期。悠揚旅夢雞聲早，迢遞鄉心鴈影遲。  
煬帝宮前休駐馬，春來多是草離離。

四

料峭東風生曉寒，送君何事恨漫漫。  
千金駿骨求應少，九曲驪珠見亦難。  
翦燭每因憐夜永，看花元不待春殘。  
情知醉後能忘別，無那平生酒量寬。

遊仙 回文

流水溪聲春落花，順風帆起曉乘槎。  
頭纏錦帶臨開鏡，臂絡珠襦近捧茶。

戲題維藩原武紀事詩後 集古

維藩尹湘陰時入覲道宿原武旅舍陋甚夜中主人

醉詬出之有詩紀其事原武河南屬邑今維藩巡按地也間見其稿相與及之一笑因戲題其後

路遶梁山匹馬遲青春衣繡共稱宜年年點檢人間事今日河南勝昔時

歐陽副使哲持耿公鳳陽書至

節鎮濠梁上因風惠好音語言如對面憂樂本同心到日思偏切看時坐轉淡京華門似水有約共幽尋

公館悶坐有懷汴宋之衰一時賢臣各繫小詩

李綱

都城一夕水湯湯先見何人獨抗章相府經營纔十日至今千載恨汪黃

宗澤

自古忠賢感槩多栽培無意奈天何宋家自失宗留守此後誰曾請過河

种師道

環州孫子萬人師守戰隨機亦已奇一月若教身後死指麾猶可濟當時

李若水

主辱人臣當死義百年待士亦非常金人却把遼人比只識青城李侍郎

張叔夜何桌

桑海茫茫事已非白溝河水首陽薇誰知此日同行者

留取生還壞岳飛

陳東歐陽澈

六賊纔誅二猾來忠魂泣血下泉臺告身何用題脩謨  
自是君王不愛才

同維藩張公登大梁門

門掩行臺日未低麗譙高處共攀躋宦情易斷吳雲杳  
鄉思難裁楚樹迷九曲河流天上下萬家烟火路東西  
具瞻爲重觀風者濟濟宮僚候馬蹄

漫興

集古

巫峽迢迢舊楚宮佳人自折一枝紅春風不道珠簾隔  
更隔蓬山一萬重

有懷叔簡

大江之西大江之東千里之隔寸心之同顛顛冠裳其  
來滿家豈無其人相知幾何人亦有言別奚足道我誠  
知之傷我懷抱何以贈子何以爲酬維松及栢歲晏同  
遊

灌園

我愛園中蔬綠葉紛蕤蕤恐有未抽芽呼童灌新水

二

造化本無意陽春豈有涯長林齊結實小草亦生花

三

漢儒子董子三載下經帷已愧天人學科名自少時



府學門外荒翳中見宋元祐中幸學詩碑命諸

生洗剔之拓三本以歸詳見題跋

曾於青史見當時今日重看幸學詩野火不燒門外石  
震雷先擊殿中碑宮牆箇箇蒼松老風雨年年碧蘚滋  
自古興衰盡如此莫因元祐重淒其

知府萬信挽詩有像侍郎于公僉事曹君贊予與張公繼焉

已矣開封守神遊十載期長因逢故吏又得話當時清  
白持高節丹青肅令儀朝廷重民牧為爾寫哀詞

開封紀行稿卷三

葉文莊公全集十一

開封紀行稿卷四

葉文莊公全集十二

崑山 葉 盛 與中著

感懷

不到家山已十年手栽松菊想依然貧無卒歲高年帛  
富有傳家負郭田金榜名高慙舊學黃門官重負新銓  
馬蹄又踏中州路王事誰云歎獨賢

二

閒來徒倚郡東樓曲曲黃河去不休四海久懸霖雨望  
諸公正切廟堂憂霜寒玉杵千門夕雲黯沙城萬里秋  
又是一聲羌笛起未曾聽徹淚先流

三

奏草常時自寫看欲將忠赤付毫端肥甘已受三年祿  
清望先叨七品官背主逆胡當授首受恩臣子敢偷安  
聖明天子中興運他日休言際會難

四

晚衙人散下堦除心在江南水竹居文筆峰頭一壺酒  
承明廬下萬言書太平浩蕩憂先集舉動光明樂有餘  
稷契許身還自笑寥寥此意欲何如

五

回首山林舊布衣世情轉覺與心違虛名不用先求志  
往事何曾早見幾草色和煙江上綠桃花著雨馬前飛  
小齋自有陽春調可是如今和者稀

六

翰苑交游共玉珂風流文雅近如何五言詩擬唐天寶  
八法書臨晉永和氣運莫如當代盛才華應過古人多  
玉皇前日羣仙會誰進清平第一歌

七

春來三月又春還浮世光陰一夢間過眼簿書諳吏弊  
發身田里恤民艱才疎願學何曾學年少求閑未可閑  
分寸功成卽歸去肯容衰老鬢毛斑

八

須信今吾是故吾由來囊底一錢無踏門有客奇男子  
廟食何人大丈夫痛飲祇須歌別鵠長驅直欲繫妖狐

平生自倚孤忠在不向清時惜壯圖

九

故園今在玉山岑爲客京華歲月侵  
萬里音書常在念  
一家骨肉總關心青襟弱子東征遠  
白髮慈親北望深  
牢落旅懷誰似我臨風搔首只長吟

十

丘樊朝市兩相宜三十功名不當遲  
精鑿肯教輪兩眼  
閑愁任是蹙雙眉吟詩作賦成何事  
問舍求田定幾時  
惟有寸心能自保蓋棺思與古人期

聞商脩撰

輅

同年陞侍讀喜而有言

相國規摹報主身太平儀鳳與祥麟  
脩文史館馳聲早

論道經帷進秩頻房杜久知天下選  
馮王不忝榜前人  
忠良得路從來少欲擬新題頌聖神

追和王磐張紳所作文丞相余左丞挽詩

宋元之季士大夫之殺身成仁者不少而紀載特詳  
焯焯在人耳目與夫有言語文字之見於編集者當  
以文丞相余左丞爲首然指南青陽等書多散落不  
完或纂次無法嘗欲重加敘定刻之未暇也間憶王  
磐張紳所作二公挽詩因各次其韻以道予情

趙宋忠臣誰第一維公奮起獨當之  
萬言慷慨登科日  
百戰艱危入相時滄海有情人未死  
皇天無意衆皆知  
平生尚友推先達吟斷南冠集杜詩

次王韻

妖星夜夜動天狼正舞天魔樂未央左轄在時斯道在  
孤城亡處此身亡兵糧不繼空書簡禮樂當興格奏章  
遺稿數篇煨燼後一回披誦一摧傷次張韻

得林掌科季聰聰洪主事子經常并南京陳御

史永言詠書

為別已三月寄將纜一書燈前幾開闔情思欲何如

故人南京書上有北京字傳遞到河南開緘見離思

壽樂堂辭奉寄張丈

迴環兮蕭墅滉瀼兮吳淞際垂垂兮嘉穀界秩秩兮甘

菘中有堂兮翼翼蔭喬木兮童童堂中之人兮神完氣  
充素髮如雪兮顏渥春紅堂之下兮采繡重割甘鮮兮  
奉巨鍾吹笙及竽兮擊鼓其逢以好德兮盛福陋彭聃  
兮遐蹤祝聖人兮萬壽開壽域兮極乎西東倚嗟兮斯  
堂樂且無窮

懷友

沈同菴魯

見說年來不入城綸巾鶴氅遂高情同菴結在長林下  
著得新書幾卷成

少年鄉里負虛名獎借曾勞太過情事業未成人老大

預愁他日愧先生

鄭介菴 文康

兩眼熒熒四海空麗天星斗在胸中好才未作中興用  
且使諸生立下風

二

天寒冰雪掩柴扃風木慈烏不忍聽君亦有情知我否  
感時青鬢欲星星

張節軒 和

滿腹穰穰富五車文章一日動京華名家子弟誰堪比  
不是蘇家是陸家

二

故家只隔水西東世契交情分外濃効死有書前日到  
也知千里寸心同

范元德 起仁

大斗老子宋名臣文采如君屬後人波浪不驚湖海濶  
震雷何日起脩鱗

二

西齋燈火舊同袍此後應無念故交十載相知不相見  
可堪懷憶寸心勞

沈承澤 瑄

新城賢胤豈尋常梧竹清氛玉雪光清世好文行見名  
蘭臺芸館看翱翔

二  
東皋館下昔談經  
愛我曾兼愛弟情  
想見過庭趨綵服  
夜淡停燭話諸生

龔郎中

理

最美郎官玉樹枝  
鞞花盤繡共稱宜  
公餘更有高情在  
江左新翻絕妙詞

二

浩笑雄談屬俊才  
眉頭偏向酒邊開  
玉河西岸朝房近  
擬見家童折簡來

沈評事

訥

讀書讀律已超羣  
節操由來更有聞  
濟濟廷評三十輩

幾人高價得如君

二

小小官居禁苑西  
幾回聯榻聽朝雞  
更長夢短人千里  
背却青燈思欲迷

夏主事

遂

籍籍聲名謝惠連  
君家兄弟故多賢  
蘇州已未題名記  
高第惟君最少年

二

遼海無波廣海清  
君歸屬我念王程  
交情只合同魚水  
不奈頻年送遠行

劉草窓

溥

愛君憂國杜陵賢更有才名似謫仙自是天教滯空谷  
好詩只合萬人傳

二

欲知別後病如何別後憂思病轉多安得相從求大藥  
閉門淡坐養天和

陳編脩鑑

清苦真同野鶴癯文章無忝北門儒平生嫉惡心如許  
欲借君王丈二笏

二

白玉堂淡不流塵酒壺詩卷可憐春于今得似前時否  
欲把情懷問故人

岳編脩正

掇得巍科也自難南人推重在賢關少年已見風齋說  
自擬昌黎彷彿間

二

漢廷人物賈生才時事關心鬱不開曾與同僚倪侍講  
瑣闥前面幾回來

王郎中謙

延閣鑿坡雨露低玉書彤管濕金泥一官供奉年華遠  
多少周行入品題

二

劍鋒開口白差差直氣由來老不衰猶記長安門外路

攢眉攜手話相知

董中書

與

家世詩書自不羣朝回衣上錦成文墨池靉靆春雲動  
臨得中郎漢八分

二

早晚過從不厭頻君家西舍我東鄰杭州佳麗從前是  
恬澹如君見幾人

金中書

混

風骨稜稜太瘦生人前書畫漫馳名看他雪色梅香裏  
吟得詩成別樣清

二

六街車馬驟紅塵靜掩閑門養病身我憶別來今幾月  
午厨香茗共何人

君子

集詩

君子思進賢也賢者既進則其類進君逸而治興焉  
彼君子兮錦衾爛兮求我庶士赫兮咺兮乃如之人兮  
邦之彥兮 彼君子兮安且吉兮烝我髦士叔兮伯兮  
展如之人兮邦之桀兮 彼君子兮朝夕從事未見君  
子耿耿不寐既見君子式燕且喜彼君子兮允矣君子  
君子三章二章章六句一章八句

杏花盛開有感

紅杏牆東感物華行人何事未還家東風似欲添離恨



一夜吹開滿樹花

湯潛舉子自陝西至館西門外

咫尺城西路依依孰可親酒杯應落魄詩句更清新樹影吳山暮鳥聲梁苑春相過好相慰同是異鄉人

挽贛州張守

專城新政令專對舊威儀未盡中州樂俄興下土悲白楊風正緊碧草露還滋觀化知何處哀歌有所思

張公談及侍郎于公巡撫因賦

新除保傅舊桐鄉采得閭閻更品量暮夜有門人不到陽秋無意客難當梁山晉水三千里棘寺兵曹二十霜河上兒童迎竹馬召南父老聽甘棠奏篇浩浩關時政

碑板峩峩發夜光今日朝廷須入相早時胡虜尚稱王祇應獨臥黃紬被不用重開綠野堂待得功成拂衣去大明脩史看流芳

傷岳武穆王用其所賦滿江紅韻

十二金牌十年事一時消歇孤負了旗名廟號精忠忠烈誰謂前朝輕社稷自是小人欺日月看將軍仁信智勇嚴言何切汴京地洪爐雪兀木輩不足滅奈當時忍使山河殘缺具獄已歸奸老手甲裳又污羸兒血想英魂冠劍儼如生陪天闕

府學觀演祭樂

八音貴諧協衆樂斯允從維絲以爲尊維金以爲宗倫

序苟無垂神人以流通矧茲薦清廟盼嚮須虔恭宜哉  
豫別室展也嚴諸公

簡致仕給事高公舉

十載抽毫侍玉除風雲回首意何如歸田漫擬潘郎賦  
教子惟存伏氏書白髮可堪摧壯志紅塵渾不到幽居  
祇因行部勤相覓得候堯夫洛下車

齋宿

學宮竊且靜聿來衆君子公事一以却齋沐咸敬只華  
燈下瑤席名香拂髹几雄談間清言大約在名理喧遠  
慮已銷意淡心逾喜倏問夜何其暫息還遽起

丁祭

大藩嚴祀事釋奠重儒先仲月從時正文明取義全德  
爲天地配道乃帝王傳濟濟官僚盛雝雝矩度虔羞陳  
思漢世廟設慕唐年燎火明堂陞爐煙拂几筵六經千  
古遠再拜一誠專舞翟齊開籥歌詩合在縣禮容真盛  
矣聖德自巍然清酏登臯洗嘉牲秩豆籩明禋殷禮畢  
受福自無愆

季聰代祀宋昌熙定昭四陵

陳橋驛畔古今情西去看君駐客旌一代輿圖開廣大  
四朝民物荷昇平山當鞏洛風雲會水入河流日夜聲  
明到不須論往事園陵只合薦精誠

李給事春代祀淮瀆

桐栢分流到海東神棲還在舊祠宮真人馭宇膺多福  
使者傳香出九重黍稌有年資利澤帆檣無恙挹祥風  
回輅爲我詢州郡誰可東南保障功

奚給事

倫

代祀中嶽漢光武周世宗

勝寢名山若箇邊使車臨發又承宣中興共仰光皇治  
未運還推世主賢松栢自依仙井上風雲長護廟門前  
嵩神有祝君須記申甫同生壽萬年

次張公贈別季聰韻

己巳八月予與二  
公同受命掌科事

同日承宣司諫省相攜今復汴中行請看慶曆諸君子  
多少謀謨荅聖情

贈別季聰

集李

黃河之水天上來千年一清聖人在我欲攀龍見明主  
秦皇漢武空相待虎鼓瑟兮鸞回車蘭亭推筆安足誇  
莫道詞人無膽氣爲君談笑靜胡沙

二

渭橋南頭一遇君與君同心握君手橋邊黃石知我心  
且盡生前一杯酒吾觀自古賢達人逢時吐氣思經綸  
天生我材必有用我輩豈是蓬蒿人餐霞樓上動仙樂  
此地曾經爲近臣

三

西嶽崢嶸何壯哉日月照耀金銀臺黃河如絲天際來  
恰似蒲萄初醱醅玉漿倘或故人飲會須一飲三百杯

四

堂上三千珠履客就中與君心莫逆堂中各有三千士  
聞道春還未相識岸上誰家遊冶郎欲行不行各盡觴  
君王雖愛蛾眉好蛾眉蕭颯如秋霜

五

美人在時花滿堂今日曾無一枝在美人不來空斷腸  
手攀玉樹長相待便欲因之向溟渤直挂雲帆濟滄海

六

吟詩作賦北窓裏春風吹落君王耳請君側耳爲我聽  
此曲乃是昇天行願入簫韶雜鳳笙散入春風滿洛城  
千門萬戶皆春聲陛下萬古垂鴻名

七

長風吹月度海來兩人對酌山花開人生在世不稱意  
何如月下傾金罍勸酒相歡不知老著鞭跨馬涉遠道  
蓬科馬鬣今已平目下離離長春草何須身後千載名  
但願長醉不復醒

八

妙年歷落青雲士遙見仙人綵雲裏仙人今列如麻  
秀眉霜雪顏桃花身騎飛龍耳生風碧玉炁炁雙目瞳  
石作蓮花雲作臺雲想衣裳花想容若待功成拂衣去  
吾將此地巢雲松

九

碧水浩浩雲茫茫不知何處是他鄉江上相逢借問君  
別意與之誰短長

十

吳姬壓酒使客嘗玉椀盛來琥珀光與君連日醉壺觴  
至今三載聞餘香矯首相思空斷腸

十一

問君西遊何時還笑而不荅心自閑傍人借問笑何事  
畏途巉岩不可攀夢魂不到關山難使我不得開心顏  
別君去時何時還

十二

愁來飲酒二千石舉杯消愁愁更愁人生違命豈暇愁

且須歌舞寬離憂君不見登高丘相思不可見惟見長  
江天際流

十三

李白乘舟將欲行何人不起故園情問子別恨知多少  
江水東流猿夜聲

十四

冀君賞爲君吟感君貴義輕黃金言亦不可盡窮亦不  
足悲開心寫意君所知國恥未雪茫然風沙淋漓颯沓  
殺人如麻不見征戍兒兒啼不窺家何日平胡虜學道  
飛丹砂拜龍顏獻漢酒小臣拜獻南山壽

次季聰韓莊郵亭見寄韻

客裏逢君正及春斯文骨肉過交親琴尊不改心期舊  
花鳥偏驚物候新近日邊庭多戰哭古來京洛有緇塵  
歸途擬約方舟去聖主虛懷候紫宸

漁樂圖

野水綸竿散誕老妻稚子團圞不識浮雲富貴焉知塵  
網波瀾

二

馬足車塵處處聽雞待漏年年偶爾題詩看畫馳心  
踏漁船

自君之出矣

自君之出矣半瓊不得暎思君如藤蔓牽繫何曾斷

二

自君之出矣見說住扶桑思君如奔波日夜往東方

關山月

胡風蕭蕭胡雲收月出皎皎關山秋秋來愁見天上月  
月本無心人自愁愁極無言淚成血含愁強與同行說  
人生一世有悲歡恰似月光圓又缺月圓月缺無已時  
客行何日是歸期願身化作月中影舉眼相看勝別離

紫駟馬

紫駟馬黃金羈青絲纏尾錦障泥唐家四十萬匹不足  
比直與周家八駿爭先馳羽林壯士如熊如貔見之辟  
易不敢騎天皇有道守在四夷雖有五兵不得已而用

之蠶彼頑酋弗率而作威天厭厥德不滅奚爲乃秣我  
馬乃與我師設繁弱之弓曳蚩尤之旗冒頓狼狽老上  
噫嘻檻俘右賢王函獻左谷蠡迅掃沙漠腥臊孽牙無  
或遺海宇廓清子孫永綏嗟哉此馬亦已奇當此時何  
所希華山之陽歸去來兮

戍婦詞

君初去黃金鎖甲隨龍馭君不來火伴傳將口信回邊  
烽高高羽書急魂招不來徒飲泣鄉里小人不解事只  
說襲官加兩級封侯廟食焉足奇阿郎長大自支持憐  
君之死死得所臨危授命真男兒古有忠臣有烈女一  
爲良人一明主君今已往妾不嫁他日無慙九泉下

壯士行

蛟騰水出地虎行風滿林稜稜一枝劍多少許君心

方給事

輔代祀伏羲商高宗

聖主開天宰百靈近臣承詔出彤廷函香特問先王廟  
制帛遙頒古帝陵河北換船波面白淮陽歇馬燒痕青  
茲行已會幽明意諸福咸臻萬國寧

望雲軒爲宋敏作

英英天際雲悠悠本無心宋生啓行軒引領情獨淡萬  
里從游歸未得久別雙親奉側望親不見望飛雲惆  
悵無聊淚沾臆常年望雲眼欲穿親在雲飛若箇邊傳  
巖久慕商臣學并州敢擬梁公賢一朝謁我夷山下青

瑣文章萬金價誰知撫卷懶題詩亦是天涯望雲者我  
有老親東海頭十年不見增煩憂已傷陟帖趨上國更  
堪駕駱巡中州宋生宋生我同調思親得似榮親好青  
雲事業早揚名古來達士全忠孝

感興

六籍去已久子氏日以蕃鳳凰難再至百鳥徒啾喧馬  
班豈不偉蘇李亦瀾翻斯道竟湮淪疇能究其源大哉  
尼父訓有德斯有言

二

商於肇封邑令下如蠶絲叅政坐朝堂新法民始疑義  
利毫髮間淳朴變澆漓天下本無事庸人紛擾之永懷

千載前稷契真吾師

三

生民本童蒙養正在厥初云胡父師者教養多孽愚強  
半事統綺或讀非聖書涓涓可滔天始習終不渝晦翁  
有遺述小子惜居諸

四

吾愛張留侯功成不自居赤松本無人黃石那有書心  
事苟已畢掉頭賦歸歟定分識者寡識之誰得如嗤彼  
聲利徒白髮滿高車

遠將歸曲得旨還朝作也

遠將歸天涯承名時朝行有知己寄書爲稱喜在外跡



漸疎在內言則邇  
答書爲報知已知  
鐵石此心元不移  
小寒食

三春已過半  
獨坐惜花時  
上國一千里  
明朝百五期  
銷愁聊命酒  
遣興強裁詩  
落落胸中事  
惟應許劍知

寒食

家家榆火柳火處處梨花  
梅花古人今人世上昨日  
明日天涯

答贈別

次宋叅政琰韻

藝苑馳聲四十春  
中朝心事外籓身  
詩篇彷彿宗寒孟  
書法分明學大詢  
炯炯丹衷長戀主  
星星華髮竟憂民

殷勤別我長河北  
岸草汀花無數新

次曹僉事韻

飄蕭黑髮戴朝簪  
玉出荆珉劍出函  
提學有名傳洛下  
登科無忝冠湖南  
滿天明月登樓詠  
四座清風拂塵談  
早晚奏功應入侍  
中牟誰解晏嬰驂

次汪綸韻

塵清官路雨初晴  
兩袖天風入帝京  
黃紙暮投山口驛  
青驪朝度水邊城  
厭聞月落啼孤鴈  
尚覺天寒禁早鶯  
十載知名纔識面  
別君多少故人情

次袁勗韻

熙熙晴日萬家春  
野酌何煩算酒巡  
楊柳巷深嘶寶馬

杏花風暖送香輪囊無私刺辭藩鎮袖有民情達禁宸  
愛爾贈行無限意庾郎詩法最清新

被命啓行爲大風雨所阻張公有詩次韻奉簡  
臨發都門首重回忽聞脚底動春雷捲將接地煙雲去  
化作洗天風雨來華髮數莖渾變雪丹心百鍊未成灰  
袖中檢點封章好有待敷陳到玉臺

清明

東風吹雨晝冥冥獨客無聊涕欲零楊柳偏從愁處綠  
松楸不改夢中青輕煙到處迎佳節新火常年出內廷  
欲問酒家歌此曲半醒半醉有誰聽

雨晴作

集杜

皇天久不雨朝野色枯槁雞鳴風雨交使我顏色好

二

久旱雨亦好旣雨晴亦佳萬人尚流冗我心殊未諧

開封紀行稿卷五

葉文莊公全集十三

崑山 葉 盛 與中著

二月十七日開封早發

行李蕭蕭一騎回  
雨餘沙路淨無埃  
誰言不帶河南物  
擔上靈蓍滿把來

延津懷古

廩延風物已蕭然  
過客仍堪問往年  
卓木臺前留客旆  
廣堂寺裏施僧錢  
桃花亂落日將暮  
燕子不來春可憐  
人事從前多代謝  
不須重詠大梁篇

宿衛輝公館

曉出大梁門  
暮宿衛源驛  
明朝放船去  
前途尚云逖  
客

子坐中夜愴然懷夙昔來時霜雪繁歸時檢新曆行行  
勿復道百年如過客

衛源

自衛輝府至通州凡二十四驛  
驛各五言律一首就以名題

曉日臨溪水西山翠欲流棹歌穿別樹漁笛起眠鷗塵  
世風中葉浮生水上舟行期自可算十日到皇州

新鎮

迢遞衛河路行行正渺茫才情憐薄宦魂夢怯殊方綠  
草緣沙淺青山倚岸長推窓看曉色知已到黎陽

濬學錢訓導

金話舊

天府曾同宴鹿鳴相逢攜手話平生萍蹤聚散十年事  
尊酒留連半日情座擁浮丘春草綠帆開衛水晚風清

飛騰早晚尋常事君有才華賦兩京

平川

岸岸春波濶村村農事幽亂禽啼古墅細草羃崇丘牧  
笛縈風起漁罾帶雨收舟行亦云適况乃少年遊

黃池

月出東山上舟行未可停客衣凝露白漁火隔煙青聖  
世陳三策童年守一經撫心多自負只合臥巖扃

回隆

薄暮且孤征悠悠恨未平片帆投暝渚殘漏下寒城破  
虜思男子捐軀念友生天高涼月白萬里獨含情

艾家口

重鎮當河朔周遭百里強天文交緯畢坤軸帶清漳過  
客思馴雉居人重樹桑朝家無事日管鑰付循良

逢張璵魏瑤二縣丞

同山衛水偶巡行幾見耕夫問姓名多少疲癯未甦息  
更將實惠答交情

陶山

水驛記曾過傍人認玉珂晚山青在眼春水綠生波官  
府催租緩人家賣酒多回看數株柳霜雪變陽和

見運夫推淺作

百斛龍驤住逆灘疲民推輓敢辭難青衫愧爾驅馳者  
何補官家尚素餐

清泉

曉色尚蒼茫霞光接水光飢鳥棲別岸乳燕下危檣浪  
簸風頭白沙冥日脚黃柁樓人好在飄泊任顛狂

清源

浬河春水濶東下晃斜陽官府築城急人家禱雨忙道  
傍稀種作渡口半流亡對此成愁絕何須憶故鄉

別文輝文著兄弟

吳下名家衆所推况君兄弟更稱奇一雙白璧渾無價  
萬里青雲定有期不向陸家誇片玉每於李氏說連枝  
匆匆未盡鄉園意回首相思恨別離

渡口

遠樹未出月片帆初起風依微明戍火隱約度僧鐘憶  
弟心偏切懷親意正濃蓼莪與常棣反覆夜窓中

甲馬營

行役幾時已吾生難免愁流年雙短鬢浮世一孤舟道  
德心難負文章死不休囂囂眼前事收拾付沙鷗

梁家莊

駱驛重來處蒼茫獨去時淡煙生斷岸斜日下荒陂天  
寶朝廷遠平原將士奇夜溪城下過鼓角有餘悲

安德

列炬照空壕車徒擁節旄水流東岸急星拱北辰高感  
激心何切馳驅興亦豪驛官閩語者揮淚問同袍

謂同僚姚

君

良店

驛舟臨水次暫息意何如涼月當官廨輕風動客裾紛  
紛人影處軋軋櫓聲餘亦有吳音者知誰好寄書

連窩

狂遊羨子長此意故難忘山水名千古舟車走萬方豪  
來看劍血情至理琴床兼濟平生學商臣有耿光

新橋

承名促歸去心馳玉陛前要知征北事常問下南船野  
鳥飛還集溪雲斷復連遣懷何物好只有浣花篇

磚河

搖搖斗柄斜脉脉旅情賒是處可爲客何人不念家醉  
瞑江上草吟對寺前花肯信雙蓬鬢流年半已華

### 乾寧

兀坐孤蓬底低回感慨淡文章千古事忠義一生心樓  
上聞笛語隆中抱膝吟英雄不可見遺恨欲霑襟

### 流河

虛館漫盤桓孤舟欲發難旅懷悲骨肉宦况激心肝積  
水兼天湧長風徹夜寒永懷沙漠路清淚不勝彈

### 聞賊臣喜寧伏誅五十韻

阻風流河驛驛官拜且說前朝見朝使喜寧已磔裂憶  
昨無事時奄人欺日月狐鼠據城社多門匪三穴閨闈

謝掃除旒辰司密勿或竊弄天機或掌握邊卒生死侵  
國柄不獨能予奪元舊及勲閥陵轍每折節助虐稔兇  
邪頤指卽馳突忠良一置喙中禍曾見殺窮邊互交通  
貢獻時督發莊田富廩積將士脚不韉守帥瘖且縮剛  
者卽摧折毫釐亦常分妄自詫功烈門戶生光采冠蓋  
相磨戛豪奢出僭濫恩寵冒希濶小人或依阿昏夜爭  
構結珠玉萃權門生民竭膏血表裏釀酖毒腹心成惡  
疾凡百移聰明往往背名實逆胡犯雲中相持寡行列  
庸諛旣壅粉無辜化異物因之欲貪功誣罔尚未畢玉  
璽御金甌垂堂戒輕出熒惑明聖心萬乘離玉闕獨運  
逞私謀節制乖本末龍袞幾傾危虎賁多汨沒誰知監

軍者乃是虜遺孽賣國甘厥心反面爲容悅往來勤括  
索巧詐飾姦黠一旦當前鋒腥膻抵京室鄉導臨我師  
指顧加嗔喝既往難重陳悲來轉幽咽維昔三王聖僕  
御皆貞吉師魚與守原齊晉有遺失迨至漢唐初位數  
猶寡缺衰季一何盛危亡始酷烈趙宋躡其後開邊事  
征伐石顯倡其毒賢臣皆戰慄田劉迭用事九重胥杞  
隍郵延德和敗太原童貫蹶前鑒誠不遠至竟戒覆轍  
我皇聿開天誓將國恥雪悔禍見天意人心亦憤切極  
惡自授首胡雛命宜絕從知常道復頗覺祆氛豁落落  
韓公手侃侃司馬舌平生吾所師兩宮之稷契大風尚  
吹塵閉門聊短述用記元年春二月廿五日

奉新

浮世本巖險行人日夜忙長河元有派遠道豈無方蟠  
石雙桃竹滄波一葦杭塵心與清景此意兩茫茫

楊青

羈思晚悠悠沿澗古岸頭沙明風色靜山近雨聲幽萬  
里長爲客半生多是愁無情河上水曲折自東流

奉推薦之末

聞張公以推薦陞大理少卿出鎮西蜀時盛亦  
半載歸朝萬里遊置身還許殿西頭同行喜有乘槎者  
近日新封博望侯



年少江南一腐儒三年兩度拜新除不才無補渾叨祿  
慚愧猶聞預薦書

楊村

搖落晚來天風沙又過船夕陽紅返照寒水綠生烟坐  
起愁不寐歌呼攪獨眠王程那可緩昏黑且須牽

河西務

短亭鄰巨鎮淺瀨阻長河去纜憑人輓行裝倩馬馱西  
山蒼靄近北闕絳雲多歸路亦從此何年許重過

潞河

日暮獨何之寒城欲近時自緣心去急不是馬行遲處  
處梨花片家家桃樹枝眼看人復業寧忍問前時

至通州聞謝

璉姚夔覃浩

三侍郎纔登舟爲之

悵然

會合從來不可常故人南去得曹郎畫船綠水幾千里  
未及悠悠離思長

王都御史

暹見過

巡行半載餘又踏通州路通州近郊畿寧復殊非故王  
公浙東彥儼然廊廟具撫循適東來下車一相顧欵欵  
平生歡惻惻衷腸苦瘡痍未全瘳心勞跡寧住維公值  
時危大藩歛奔赴經濟藉英雄况乃明良遇澄清先一  
州君相方倚注巨川作舟楫大旱爲甘澍所望在斯民  
豈曰聲名樹

經永通橋侍郎王公永和造古  
廉祭酒李公時勉記

河水日落溶溶後  
猊甃石崇已無病  
涉歎端有濟川功  
渾訝將沉月還疑乍  
渴虹讀殘亭下石  
惆悵舊司空

花園道中

紫殿紅樓青瑣闥  
尋常雲氣護龍光  
小臣瞻望心如渴  
明日舍香見玉皇

二

去家三舍路依微  
滿眼羈愁覺漸稀  
知是九重宣命久  
家人日日整朝衣

入京

歇馬禁城東西山  
落照紅衣冠留湛  
露門第藹清風奏

甌須重閱詩囊且  
斲封平明有朝謁  
名向閤門通

開封紀行稿卷五

葉文莊公全集





